



KANUKOKA  
P. H. Lundsteensvej 2  
Postbox 10  
3900 Nuuk

**Inissiani attartortittakkani ineqarnermut tapiissutit pillugit Inatsisartut inatsisissaattut nr. xx-p ulluisa xx-anni 2015-imeersoq pillugu tusarniaassummut akissuteqaat**

Inatsisissatut siunnersuummi nassiunneqartumi siunertanut pingaarnertut isumaqataalluta tullinnguuttunik makkuninnga oqaaseqaatissaqarpugut.

Nalinginnaasumik nassuiaatini immikkoortoq 3.2-mi pisortat allaffissorneranni kingunerisassat pillugit imatut allassimasoqarpoq; inatsisissatut siunnersuut pissutaalluni pisortat allaffimmi suliaassanik amerlanerusunik suliaasaqalissapput. Tamanna ilutigalugu inatsisissatut siunnersuut inatsisaareersumut sanilliullugu pisortani allaffimmiut annertunerusumik suliaasaqalissanngitsut allassimavoq. Taamaattumik tamanna imminut akerliusoq ingerlatsivimmit malugisimavarput, minnerunngitsumik allaffinni ingerlaavartumik nakkutilliisarnissamik piumasaqaatit eqqarsaatigalugit, inatsisissatut siunnersuummi § 7 takuuk. Taamaattumik allaffimmi suliaassat amerlanerulersut kommunini inuit aalajangersimasumik amerlassusillit ukiumi ataatsimi sulinerattut allangortinneqassasut, tamakkulu ataatsimoortumik tapiissutinik naatsorsuinernut ilanngunneqassasut siunnersuutigerusupparput.

Siunnersuutigerusupparput § 2-mut nassuiaatini imaluunniit inatsisit pillugit ilitsersuummi atuaruminartumi inuit nalunaarsorneqartarfiannut angerlarsimaffimmit ataatsimit ilanngussisimappata tamanna tassaasoq inoqutigiit ataatsimoorfigisaattut takussutissaasussatut allassimassasoq. Meeqqanut tunngatillugu meeqqat meeraviunersut, meeravissiaanersut, ernutaanersut meeraanersulluunniit paarineqartut angajoqqaaminnit, aatakkuminnit angajoqqaarsiaminnilluunniit najugaqateqarnersut erseqqissarneqassasut . Aammattaaq meeraq ilaqutariinni angajoqqaarsiaqarluni paarineqartoq (nammineq piumassutsiminik pinngitsaalliinikkulluunniit inissinneqarsimasoq) – paarsinerup sivisussusissaa aalajangerneqarsimanngippat apeqqutaatinnagu – angajoqqaavimmini inoqatigiinnut ilaasutut ilanngullugu naatsorsorneqarsinnaanersoq siunnersuutigerusupparput, angerlarsimaffiup aqqissuunneqarnerani ilaatigut meeqqap utaqqiisaasumik paarineqarnera aamma kingusinnerusukkat ataavartumik angerlartinneqarnissaanut periarfissat eqqarsaatigineqarsimappata. Taamatut pisoqartillugu meeraq angajoqqaavimmini inoqutigiit ilaattut aamma angajoqqaarsiamini inoqutigiit ilaattut ilanngullugu naatsorsorneqarsinnaasariaqarpoq. Taamatut inatsisissatut siunnersuuteqarnermi meeqqap pisariaqartitai qitiutinneqalersinnaapput, aamma ineqarnermut tapiissutit pillugit inatsimmi.

§ 5, immikkoortoq 1 innersuussutigalugu ineqarnermut tapiissutissanik naatsorsuinerni maannakkut isertitat amerlassusiat pillugit paasissutissaanerpaat pingaartinniarneqarnerat isumaqatigisinnaavarput, tamannalu ataatsimut isigalugu atugarissaarnissamut ikiorsiissutit isertitat apeqqutaatillugit tunniunneqarneranni kissaatigisorujussuuarput. Tamanna ilutigalugu inoqutigiit maannakkut isertitaannik naatsorsuinissamut piumasaqaataasut inatsit pillugit naatsorsuinissamut ilitsersuummi atuariminartumi ersarissarneqarnissaat qinnuteqaatigaarput. Aammattaaq aningaasaatinut ilanngussaasinnaasut, soorlu Danmarkimi ineqarnermut tapiissutit pillugit inatsimmi taamaattoq, naatsorsuinermut ilanngunneqarsinnaanerat siunnersuutigaarput.

Inatsisissatut siunnersuummi § 5, immikkoortoq 2-mi inoqutigiit maannakkut isertitaasa

annertuumik allannguuteqarneranni ineqarnermut tapiissutit naatsorsoqqinneqassasut allassimavoq. *Annertuumik* allannguutit maannakkut isertitani tamarmiusuni qanoq amerlatiginersut ersarissarneqassasut siunnersuutigerusupparput.

Annertuumik allannguutinik nalilersuinerimi procentit aalajangersimasut imaluunniit allatut naatsorsuinissamut erseqqinnerusumik killiliussat allat allanngorsimasut eqqarsaatigineqassanersut innuttaasunut kommuninullu ilitsersuutaasinnaavoq. Taamatut erseqqissaaneq inatsisissatut siunnersuummi § 6-imi, inatsisissatut siunnersuummi § 7-imi kommunimi ingerlaavartumik nakkutilliusussaataaneq kiisalu inatsisissatut siunnersuummi § 13-imi tapiissutinik utertitsilluni akiliisarnissaq pillugu aalajangersagaq innuttaasut paasissutissiisussaataanerani nalilersuinerimi eqqarsaatigissallugit pingaaruteqarpoq.

Inatsisissatut siunnersuummi § 12, immikkoortoq 1-imi qinnuteqaatigineqartup "akuerineqarneraniit" qaammatip ulluisa aallaqqaataaniit atuutilersumik ineqarnermut tapiissutit tunniunneqartassasut allassimavoq. Oqaaseq "akuerineqarneraniit" oqaatsimut *tunniussinermiit*-mut allanngortinneqarnissaa siunnersuutigerusupparput, taamaalilluni inatsimmi oqaatsinut atorineqartunut atuuttunut naapertuutilerniassammat.

Tamatumani oqaatsip "akuerineqarnerani" ineqarnermut tapiissutit suliassamik sularinninnerup inaarutaasumik naammassineqarnerata kingorna qaammatip ulluisa aallaqqaataaniit atuutilersumik ineqarnermut tapiissutit tunniunneqarsinnaanerata paatsorneqarsinnaaneraniq pissuteqarpoq, tassami suliassamik sularinneq arlaannik pissuteqartumik sivitsortuussagaluarpat tamanna inatsisinik unioqqutitsinaveersaarneq eqqarsaatigalugu akuerineqarsinnaassanngimmat.

Inatsisissatut siunnersuummi § 13, immikkoortoq 1-imi qinnuteqaateqartup imaluunniit ineqarnermut tapiissutinik pisartagallip paasissutissiisussaatinini sumiginnarsimappagit ineqarnermut tapiissutit kommunimi aningaasat utertillugit akilerneqarnissaannik aalajangiisoqarsinnaasoq allassimavoq, § 6 takuuk. Oqaaseq "sinnaavoq" oqaatsimut *ssaaq*-mut allanngortinneqassasoq siunnersuutigerusupparput, tamatumani innuttaasoq paasissutissiisussaataanerminik malinninnissaminut akisussaaffianik erseqqisaatigineqarfigineqassaaq.

§ 13-imut tunngatillugu taanna immikkoortumik 4-mik ilaneqassasoq siunnersuutigerusupparput, tassanilu ineqarnermut tapiissutinik utertitsinissamik piimasaqaatit siunissami ineqarnermut tapiissutini ilanngaatigineqarsinnaasut allassimassaaq. Ilaatigut tamanna inatsisit malillugit ilanngaassisinnaatitaaneranut naapertuutissaaq, soorlu tamanna isumaginninneq pillugu inatsimmeereersoq, assersuutigalugu utoqqalinersiassat pillugit inatsimmi. Ilaatigut tamatumani innuttaasut namminneq paasissutissiisussaataanerminik malinninnissaannut tunngavissiissaaq.

Inatsisissatut siunnersuummi § 15, immikkoortoq 1-imi ineqarnermut tapiissutinut aningaasartuutit inatsit naapertorlugu kommunimit 40 procentit 60 procentillu Nunatta Karsianit tunniunneqassasut allassimavoq. Tullerijaaaraneq killormut saatinneqassasoq siunnersuutigerusupparput, taarsiullugulu inatsit naapertorlugu ineqarnermut tapiissutini aalajangersagaq pillugu nassuiaatit naapertorlugit 60 procentit Nunattalu Karsianit aamma 40 procentit kommuninut akilerneqartussaasut allassimasunngorluni.

Ineqarnermut tapiissutit ikiorsiissutaammata innuttaasorpasuarnullu iluaqutaammata inatsimmik akuersissuteqarnermut tunngatillugu Namminersorlutik Oqartussani suliassaqaarfimmi allannguutit pillugit paasititsiniaaneq aallartinneqassasoq siunnersuutigerusupparput, tamatumani innuttaasut pisinnaatitaaffii pisussaaffiilu ersarissarneqarlutik.

Aammattaaq inatsisip atuuttussanngortinneqannginnerani Namminersorlutik Oqartussat suliassaqaarfimmi kommunini sulisunik inatsit nutaaq pillugu pikkorissartitsinissaat kissaatiginartitorujussuarput.

Inussiarnersumik Inuulluqqusilluta/

Malene Lynge  
Isumaginninnermut,  
Suliffeqarnermut  
Inuussutissarsiateqarnermullu  
Ataatsimiititami siulittaasoq

Gretheb H. Nielsen  
Isumaginninnermut, Suliffeqarnermut  
Inuussutissarsiateqarnermullu  
Ingerlatsivimmi pisortaq